

**VENDIM**  
**Nr. 789, datë 15.12.2021**

**PËR KRITERET, MËNYRËN E SHPËRBLIMIT DHE TRAJTIMIN E  
SPORTISTËVE, QË PËRFITOJNË STATUSIN E NIVELIT TË LARTË, DHE  
TRAJNERËVE TË TYRE**

*(Ndryshuar me VKM nr. 167, datë 20.3.2024; nr. 631, datë 10.10.2024; nr. 829, datë  
30.12.2025)*

*(I përditësuar)*

Në mbështetje të nenit 100 të Kushtetutës dhe të pikës 5, të nenit 27, të ligjit nr. 79/2017, “Për sportin”, të ndryshuar, me propozimin e ministrit të Arsimit dhe Sportit, Këshilli i Ministrave

**VENDOSI:**

1. Miratimin e kriterëve për përfitimin nga sportisti të statusit të nivelit të lartë, sipas rezultateve të arritura në veprimtaritë ndërkombëtare apo kombëtare. Klasifikimi i këtyre rezultateve në veprimtaritë ndërkombëtare dhe kombëtare jepet sipas tabelave I dhe II, që i bashkëlidhen këtij vendimi dhe janë pjesë përbërëse e tij.

2. Sportistët mbajnë statusin e nivelit të lartë nga momenti i marrjes së rezultatit zyrtar në veprimtaritë ndërkombëtare apo kombëtare deri në marrjen zyrtare të rezultatit nga një sportist tjetër pasardhës në atë sport.

3. Sportistët, që gëzojnë statusin e nivelit të lartë, përfitojnë shpërblim dhe trajtim, sipas përcaktimeve të bëra në këtë vendim.

4. Masa e shpërblimit financiar *për sportet olimpike*, për çdo rezultat të arritur, jepet sipas tabelave I e II, që i bashkëlidhen këtij vendimi dhe janë pjesë përbërëse e tij, e jepet pas shpalljes së rezultateve përfundimtare zyrtare të veprimtarisë sportive nga federata ndërkombëtare/kombëtare e atij sporti. *Për sportet joolimpike, shpërblimi financiar është në masën 40 (dyzet) % të vlerave të përcaktuara në tabelën I dhe në masën 100% të vlerave të përcaktuara në tabelën II.*

*4/1. Sportisti shpërblehet financiarisht vetëm për një rezultat sportiv të arritur në veprimtaritë ndërkombëtare zyrtare, Kampionat Botëror, Evropian, Ballkanik, gjatë vitit kalendarik, në një disiplinë, sipas tabelës nr. I. Në sportin e peshëngritjes, sportisti i klasifikuar në dygarësh shpërblehet vetëm për rezultatin përfundimtar, në masën 100%.*

5. Integrimi i sportistëve në sistemin arsimor me drejtim sportiv, i siguron kombëtare e mbrojtjes dhe punësimi i tyre në strukturat e Ministrisë së Mbrojtjes dhe Ministrisë së Brendshme përfitohet vetëm 1 (një) herë brenda periudhës së përcaktuar në pikën 2, të këtij vendimi.

6. Sportistët e sporteve individuale, të kategorisë “të rinj”, që arrijnë rezultate në veprimtaritë ndërkombëtare, sipas tabelës I, shpërblehen në masën 30 (tridhjetë) % të vlerës së përcaktuar për kategorinë “të rritur”. *Kategoria “të rinj” përcaktohet nga niveli “Junior Championship” i kampionatit ndërkombëtar ose në moshat U-16, U-17, U-18, U-19 vetëm në rastet kur mungon kategoria “Junior Championship” në federatat përkatëse ndërkombëtare.*

7. Trajnerët e sportistëve, që kanë përfituar statusin e nivelit të lartë, sipas këtij vendimi, shpërblehen në masën 40 (dyzet) % të vlerës që përfiton sportisti me këtë status.

8. Sportistët e nivelit të lartë dhe trajnerët e tyre, pjesëmarrës në veprimtaritë kombëtare, të përcaktuara në rregulloret e federatave sportive përkatëse dhe në veprimtari ndërkombëtare, për përgatitjen e tyre përfitojnë trajtim ushqimor në natyrë ose në vlerë, si dhe trajtim mjekësor.

9. Trajtimi ushqimor është jo më pak se 3 500 (tre mijë e pesëqind) lekë në ditë, për 25

(njëzet e pesë) ditë në muaj.

10. Shpenzimet për trajtimin mjekësor vlerësohen sipas dokumenteve justifikuese për periudhën e trajtimit.

11. Trajtimi ushqimor e mjekësor për periudhën e grumbullimit dhe të pjesëmarrjes në veprimtaritë ndërkombëtare zyrtare të sportistit, sipas tabelës I, në përbërje të ekipit përfaqësues kombëtar, mbulohet nga federata sportive përkatëse.

12. Efektet financiare për shpërblimin e trajtimin e sportistëve të nivelit të lartë dhe trajnerëve të tyre, në sportet individuale, që arrijnë rezultate në veprimtaritë ndërkombëtare, sipas tabelës I, përballohen nga fondet e buxhetit të shtetit, miratuar për ministrinë përgjegjëse për sportin. Masa e shpërblimit për sportistët e nivelit të lartë dhe trajnerët e tyre jepet me urdhër të ministrit përgjegjës për sportin.

13. *Për shpërblimin financiar dhe trajtimin e sportistit të nivelit të lartë, për sportet individuale, që ka arritur rezultate në veprimtaritë ndërkombëtare, sipas tabelës nr. I, federata shqiptare sportive përkatëse aplikon në portalin unik qeveritar “e-Albania”. Në aplikim përcaktohet rezultati përfundimtar në veprimtarinë ndërkombëtare, në të cilën sportisti ka marrë pjesë, si dhe deklarimi i federatës që sportisti nuk ka rekorde pozitive të doping-ut, të konfirmuar nga Organizata Kombëtare Antidoping. Ministria përgjegjëse për sportin verifikon përmbushjen e kriterëve pas marrjes së kërkesës dhe, në rast të të metave në aplikim, aplikuesi ka të drejtën për plotësimin e tyre brenda afatit shtatëditor.*

13/1. *Federata duhet të kryejë pagesën e shpërblimit të sportistit dhe trajnerit brenda 30 (tridhjetë) ditëve nga disbursimi i fondeve nga ministria përgjegjëse për sportin.*

14. Gjatë vitit kalendarik, përjashtuar periudhën e grumbullimit dhe të pjesëmarrjes në veprimtaritë ndërkombëtare zyrtare të sportistit, sipas tabelës I, sportisti dhe trajneri i tij përfitojnë trajtim ushqimor e mjekësor për përgatitjen sportive dhe pjesëmarrjen në veprimtaritë kombëtare zyrtare.

15. Efektet financiare për shpërblimin e trajtimin e sportistëve të nivelit të lartë dhe trajnerëve të tyre, që arrijnë rezultate në veprimtaritë kombëtare, sipas tabelës II, përballohen nga fondet e njësive të vetëqeverisjes vendore ose të ardhura të tjera të ligjshme. Masa e shpërblimit për sportistët e nivelit të lartë dhe trajnerët e tyre jepet me urdhër të kryetarit të njësisë së vetëqeverisjes vendore.

16. Për shpërblimin financiar dhe trajtimin e sportistit të nivelit të lartë, për sportet individuale, apo të ekipit sportiv, për sportet kolektive, që kanë marrë vendin e parë në kampionatin kombëtar, organizata sportive përkatëse, që ushtron veprimtarinë në territorin e njësisë së vetëqeverisjes vendore, paraqet kërkesën pranë saj. Të drejtën për të paraqitur kërkesë e ka edhe sportisti apo trajneri i tij. Kërkesa shoqërohet me rezultatin përfundimtar të federatës shqiptare të atij sporti, referuar kampionatit kombëtar, në të cilin sportisti apo ekipi sportiv ka marrë vendin e parë. Njësia e vetëqeverisjes vendore verifikon përmbushjen e kriterëve pas marrjes së kërkesës. Fondet alokohen për organizatën sportive të sportistit/ekipit sportiv dhe trajnerit të tij, për llogari të këtyre të fundit.

17. Sportistët, të cilët kanë përfutur statusin e nivelit të lartë, pas hyrjes në fuqi të ligjit nr. 105/2020, “Për disa shtesa dhe ndryshime në ligjin nr. 79/2017, ‘Për sportin’”, trajtohen sipas parashikimeve të këtij vendimi.

17/1. *Procedura e aplikimit sipas këtij vendimi, nëpërmjet portalit unik qeveritar “e-Albania”, zbatohet pasi ministria përgjegjëse për sportin të publikojë në Buletinin e Njoftimeve Zyrtare realizimin e shërbimit elektronik. Deri në këtë njoftim, aplikimet do të dorëzohen në formë shkresore pranë ministrisë përgjegjëse për sportin.*

18. Vendimi nr. 687, datë 14.11.2018, i Këshillit të Ministrave, “Për kriteret, mënyrën e shpërblimit dhe përfitimin e trajtimit për përgatitjen sportive të sportistëve, që përfitojnë statusin e nivelit të lartë”, shfuqizohet.

19. Ngarkohen Ministria e Arsimit dhe Sportit, Ministria e Brendshme, Ministria e Mbrojtjes, njësitë e vetëqeverisjes vendore dhe organizatat sportive shqiptare për zbatimin e këtij vendimi.

Ky vendim hyn në fuqi pas botimit në Fletoren Zyrtare.

ZËVENDËSKRYEMINISTËR

**Arben Ahmetaj**

**Tabela I**

**VEPRIMTARITË NDËRKOMBËTARE ZYRTARE**

**Tabela nr. 1:**

*(Ndryshuar me VKM nr. 829, datë 30.12.2025)*

| <b>Veprimtaria</b>   | <b>Rezultati</b> | <b>Masa e shpërblimit</b> |
|----------------------|------------------|---------------------------|
|                      | Rekord olimpik   | 15 000 000 lekë           |
|                      | Rekord botëror   | 15 000 000 lekë           |
|                      | Rekord evropian  | 6 000 000 lekë            |
|                      | Rekord mesdhetar | 3 000 000 lekë            |
|                      | Rekord ballkanik | 1 500 000 lekë            |
|                      |                  |                           |
| Lojëra olimpike      | Vendi i parë     | 15 000 000 lekë           |
| Lojëra olimpike      | Vendi i dytë     | 10 000 000 lekë           |
| Lojëra olimpike      | Vendi i tretë    | 7 000 000 lekë            |
| Lojëra olimpike      | Vendi i katërt   | 4 000 000 lekë            |
| Lojëra olimpike      | Vendi i pestë    | 2 000 000 lekë            |
| Lojëra olimpike      | Vendi i gjashtë  | 1 000 000 lekë            |
| Lojëra olimpike      | Vendi i shtatë   | 800 000 lekë              |
| Lojëra olimpike      | Vendi i tetë     | 500 000 lekë              |
|                      |                  |                           |
| Kampionat botëror    | Vendi i parë     | 10 000 000 lekë           |
| Kampionat botëror    | Vendi i dytë     | 6 000 000 lekë            |
| Kampionat botëror    | Vendi i tretë    | 4 000 000 lekë            |
| Kampionat botëror    | Vendi i katërt   | 2 000 000 lekë            |
| Kampionat botëror    | Vendi i pestë    | 1 000 000 lekë            |
| Kampionat botëror    | Vendi i gjashtë  | 800 000 lekë              |
| Kampionat botëror    | Vendi i shtatë   | 600 000 lekë              |
| Kampionat botëror    | Vendi i tetë     | 400 000 lekë              |
|                      |                  |                           |
| Kampionat evropian   | Vendi i parë     | 4 000 000 lekë            |
| Kampionat evropian   | Vendi i dytë     | 2 000 000 lekë            |
| Kampionat evropian   | Vendi i tretë    | 1 000 000 lekë            |
| Kampionat evropian   | Vendi i katërt   | 800 000 lekë              |
| Kampionat evropian   | Vendi i pestë    | 600 000 lekë              |
| Kampionat evropian   | Vendi i gjashtë  | 400 000 lekë              |
|                      |                  |                           |
| Lojëra Mesdhetare    | Vendi i parë     | 2 000 000 lekë            |
| Lojëra Mesdhetare    | Vendi i dytë     | 1 000 000 lekë            |
| Lojëra Mesdhetare    | Vendi i tretë    | 800 000 lekë              |
|                      |                  |                           |
| Kampionati Ballkanik | Vendi i parë     | 1 000 000 lekë            |

*Shënim. Në sportin e peshëngritjes, sportistët që arrijnë rezultate në veprimtaritë ndërkombëtare, në dygarësh (total), sipas tabelës I, shpërblehen në masën 30% të vlerës së përcaktuar për atë rezultat.*

**Tabela II**

**VEPRIMTARITË KOMBËTARE ZYRTARE**  
*(ndryshuar me VKM nr. 167, datë 20.3.2024)*

|                                                                      | <b>Rekord kombëtar</b> | <b>Jo më pak se 200 000 lekë</b> |
|----------------------------------------------------------------------|------------------------|----------------------------------|
| Kampionati Kombëtar në Sportet Individuale                           | Vendi i parë           | Jo më pak se 100 000 lekë        |
| Kampionati Kombëtar i Kategorisë më të<br>Lartë në Sportet Kolektive | Vendi i parë           | Jo më pak se 500 000 lekë        |